

Pengetua Guru Besar Hadiri Taklimat #3A Peringkat Jabatan Pendidikan Wilayah Persekutuan Labuan



Labuan, 17 Januari 2020 – Seramai 27 peserta terdiri daripada Pengetua , Guru Besar dan wakil-wakil PGB telah menghadiri taklimat pelaksanaan Sedar, Peka, Tindak (#3A) peringkat Jabatan Pendidikan Wilayah Persekutuan Labuan. Bengkel ini telah berlangsung di bilik mesyuarat SMK Pantai.

Taklimat yang bermula jam 2.30 petang telah disampaikan oleh Kaunselor Pendidikan Negeri, Sektor Psikologi dan Kaunseling Jabatan Pendidikan W.P. Labuan, Encik Sabdin bin Japaruddin.

Menurut beliau, program #3A bertujuan untuk meningkatkan kesedaran kesejahteraan psikologi diri dalam kalangan warga guru. Program ini lanjutan daripada tahun lalu dan dijangka akan diselesaikan dalam masa setahun bermula

sejak Ogos 2019 sehingga Ogos 2020.

Sebanyak 11 bahan perkongsian telah di sediakan oleh Kementerian Pendidikan Malaysia yang disarankan untuk dikongsi bersama guru-guru di sekolah.

Tajuk-tajuk yang dipilih adalah sangat relevan kepada guru dalam mengharungi kerjaya sepanjang perkhidmatan. Antara tajuk perkongsian tersebut ialah Kesejahteraan Mental, Pengurusan Kewangan, Pengurusan Stress, Komunikasi Berkesan dan Pengurusan Kemurungan.

Pengetua dan Guru Besar pula bertanggungjawab menyampaikan taklimat berdasarkan tajuk-tajuk yang disediakan setiap bulan kepada guru-guru di sekolah. Laporan pelaksanaan taklimat di sekolah perlu di hantar kepada pihak jabatan untuk tujuan pemantauan.

Yang Dipertua MPSM Labuan, Encik Ismail bin Abdullah yang hadir dalam sesi taklimat tersebut berkata, isu-isu yang disampaikan melalui taklimat #3A ini adalah sangat sesuai dan relevan kepada guru-guru.

“Tajuk-tajuk yang dipilih mampu menjadi panduan kepada warga guru terutamanya dalam menangani cabaran ke arah kesejahteraan diri sepanjang perkhidmatan.” Encik Ismail Abdullah

Berita Oleh : Setiausaha MPSM

Perhimpunan Bulanan JPWPL

Januari 2020 : Pemimpin Sekolah Berkesan Pemangkin Kemenjadian Murid



Labuan, 16 Januari 2020 – ‘Pemimpin Sekolah Berkesan Pemangkin Kemenjadian Murid’, demikian tema bagi bulan Januari yang telah disampaikan oleh Pengarah Pendidikan Wilayah Persekutuan Labuan, Encik Raisin Saidin.

Sempena perhimpunan bulanan pada kali ini, murid-murid yang telah berjaya mengangkat nama Labuan samada di peringkat kebangsaan dan antarabangsa tahun 2019 telah diberikan Anugerah Adiwira Muda Pendidikan Labuan.

Penganugerahan ini merupakan manifestasi usaha yang bersungguh-sungguh secara bersama bagi memberi semangat dan galakan kepada murid, yang diilhamkan oleh Encik Raisin Saidin, bermula tahun 2019.

Seramai 10 murid yang telah diangkat sebagai Adiwira Muda Pendidikan Labuan, iaitu :

1. Rafdhi Firlhi Junaidi, SK Pekan Dua. Johan Kategori

Traditional Form (Rammuay/Muaythai), Pingat Gangsa Amateur K1 Sanda, Pertandingan Borneo Martial Art Expo 2019.

2. Nur Aneesa Aira Mohamad Affendi, SK Pekan Dua, Pingat Perak Kejohanan 21st USKU International Karate Open Championship 2019, Takanabe-Cho, Miyazaki, Japan, Pingat perak Kumite 10-11 years girl Kejohanan 11st Kota Kinabalu Karate Open Championship 2019.
3. Nur Izziani Mohd Idzam, SMK Pantai, Pingat Gangsa Pertandingan Guangdong China Final Elite Group Taekwando League 2019.
4. Mohd Nur Nazhan Abdullah, SMK Lajau, Pingat Emas Putera Kelas A, Kejohanan Silat Warisan Dato Maharajalela 2019.
5. Nurul Shafina Mohd Supian, SMK Lajau, Pingat Gangsa Kejohanan Silat Warisan Dato Maharajalela 2019.
6. Nur Nabilla Hartono, SMK Labuan, Pingat Emas Puteri Kelas F, Kejohanan Silat Warisan Dato Maharajalela 2019.
7. Nur Athirah Asmawi, SMK Labuan, Pengakap Raja Persekutuan Pengakap Malaysia (PPM) Negeri WP Labuan 2019.
8. Muhammad Aiqal Asmadie, SM St Anthony, Emas Open Karate-Do Kejohanan 19th Thailand Open Karate-do Championship 2019 dan Emas Junior High School Male Kata, Kejohanan 21st USKU International Karate Open Championship 2019, Takanabe-Cho, Miyazaki, Japan.
9. Mohd Ansarullah Sabarudin, Naib Johan Perseorangan Lelaki Kejohanan Juara Tangkis Tun Dr. Siti Hasmah 2019.
10. Mohd Azib Aiman Mohamad Affendi, SM Sains Labuan, Pingat Gangsa High School Male Kata, Kejohanan 21st USKU International Karate Open Championship 2019, Takanabe-Cho, Miyazaki, Japan, Pingat Gangsa

Individu Kata Kadet 55 kg, 19th Thailand Open Karate-Do Championship, Emas Kategori Male Junior Kata dan Kumite, 6th Legend International Karate Club Championship 2019, Selangor, Emas Kategori Individu Kumite Junior, 1st Borneo Karate Open Championship 2019, Brunei Darul Salam.



Encik Raisin Saidin menyampaikan sijil Adiwira Muda kepada Adik Nur Athirah Asmawi yang mendapat Anugerah Pengakap Raja 2019



■ Mohd Azib Aiman Mohamad Affendi, SM Sains Labuan



■ Mohd Ansarullah Sabarudin, SMK Mutiara

Cikgu Yee Choon Hian dari SM St Anthony juga turut menerima Anugerah Khas Pengarah bagi bulan Januari di atas komitmen menjadi Pengerusi Teknik dan Pembangunan Sukan Badminton sejak tahun 2002 sehingga kini. Beliau pernah memegang jawatan ketua teknikal kejohanan badminton MSSM pada tahun 2006 dan 2013. Beliau juga pernah dipanggil menjadi jurulatih kebangsaan pada tahun 2013 dalam kejohanan persahabatan bersama atlet muda Jepun dalam program KPM dan Astro.

Terbaharu beliau telah berjaya melahirkan pemain perseorangan lelaki yang cemerlang, adik Ansarullah dari SMK Mutiara menjadi naib johan pertandingan juara tangkis Piala Tun Siti Asmah, pada Disember 2019.

Pembacaan ikrar perkhidmatan awam pada perhimpunan pertama Jabatan Pendidikan WP Labuan tahun 2020 ini telah diketuai sendiri oleh Encik Raisin Saidin. Ini adalah gambaran komitmen tinggi beliau menggalas amanah yang dipikul dan seterusnya mengajak seluruh warga pendidikan Labuan mengangkat martabat profesion keguruan.



Encik Raisin Saidin mengetuai lafaz ikrar perkhidmatan awam

Encik Raisin Saidin telah membentangkan 10 Ciri Utama Pemimpin Sekolah Abad ke-21 Yang Berjaya. Ciri-ciri tersebut ialah Kejujuran dan integriti, Keupayaan meyakini dan mengupayakan orang lain, Berkomunikasi, berkerjasama dan dan sentiasa berhubungan, Aura positif,

Keyakinan, Komitmen dan kesungguhan, Kesediaan untuk belajar, tinggalkan pemikiran lama dan kukuhkan pengetahuan, Keusahawanan, kreatif dan inovatif, Naluri Intuitif/ Gerak Hati dan Kebolehan untuk memberi inspirasi.

“Sekolah terbaik didorong oleh warganya sendiri yang bersungguh-sungguh membawa perubahan samada di dalam atau di luar bilik darjah yang akhirnya membawa keberhasilan kemenjadian anak-anak muridnya”. Encik Raisin Saidin



Encik Raisin Saidin bersama barisan pemimpin, Pengetua Sekolah Menengah Labuan

Dalam menyatukan guru-guru di pulau ini maka Encik Raisin Saidin mengajak seluruh lapisan warga pendidikan mengamalkan dan menghayati perkara berikut:

1. Guru
sayang muridnya
2. Roh guru mendarah daging dalam diri setiap guru
3. Guru mengajar murid belajar dan
berbuat
4. Meningkatkan kecemerlangan dan
kemenjadian murid yang menyeluruh

5. Setiap ringgit peruntukan dibelanjakan hendaklah memberi pulangan yang maksimum kepada murid

Kelaziman majlis, penyampaian sijil-sijil penghargaan kepada pihak sekolah, *staff of the month* dan sambutan hari jadi kepada warga pendidikan sentiasa memeriahkan saban perhimpunan JPWPL.

Semoga tahun 2020, cabaran global yang memberi tekanan lebih mencabar dalam Abad ke-21, namun paksinya tetap sama, Kemenjadian Murid diutamakan.



Encik Raisin Saidin menyampaikan Anugerah Khas Pengarah kepada Cikgu Yee Choon Hian, diperhatikan oleh Ustaz Syahir dan Encik Azryn



Encik Raisin Saidin menyampaikan Sijil Penghargaan kepada pihak Sekolah





Meraikan sambutan hari jadi kepada warga pendidikan yang lahir bulan Januari

Foto : Tuan Haji Sawal Salleh

Hari pertama persekolahan 2020 Di Labuan Berjalan Lancar



Labuan, 2 Jan 2020 – Seramai 1,650 murid Tahun Satu memulakan sesi persekolahan di sekolah rendah di Labuan hari ini.

Pengarah Pendidikan Wilayah Persekutuan Labuan, Encik Raisin Saidin berkata secara keseluruhan jumlah murid sekolah rendah di wilayah ini ialah 9,732 orang. Manakala murid sekolah menengah mencatatkan 6,071 dan prasekolah seramai 807 murid berdaftar.

Keseluruhan murid berdaftar pada awal sesi persekolahan 2020 termasuk murid prasekolah di Labuan ialah seramai 16,610 orang.

Encik Raisin Saidin bersama dengan Timbalan-Timbalan Pengarah Pendidikan serta Ketua Penolong Pengarah Sektor Pentaksiran Dan Peperiksaan telah menyambut dan mengalu-alukan kehadiran murid-murid SK St. Anne WP Labuan pada hari pertama persekolahan 2020.

Semasa perhimpunan awal pagi di Sekolah SK St Anne, Encik Raisin Saidin menzahirkan kegembiraan di atas kehadiran murid-murid yang datang ke sekolah dalam keadaan sihat untuk memulakan sesi persekolahan.



Murid-murid SK ST Anne dalam perhimpunan awal pagi sesi persekolahan 2020



YDP PIBG SK St Anne, Ketua Penolong Pengarah, Timbalan-

timbangan Pengarah Jabatan Pendidikan WP Labuan, Pegawai Polis turut serta dalam menghadiri perhimpunan sekolah SK St Anne pada 2 Januari 2020

Beliau berkata, 4 pendekatan yang difokuskan oleh Jabatan Pendidikan Wilayah Persekutuan Labuan pada tahun 2020 iaitu guru sayang muridnya, aura roh guru sentiasa mendarah daging dalam diri guru, guru mengajar murid belajar, meningkatkan kecemerlangan dan kemenjadian murid secara menyeluruh.

Encik Raisin Saidin menekankan perkara tersebut kerana peranan guru amat penting sebagai pelaksana paling hadapan iaitu di bilik darjah.

Tambahnya lagi setiap ringgit daripada peruntukan kewangan yang diterima daripada Kementerian Pendidikan Malaysia dan dibelanjakan sama ada di peringkat Jabatan mahu pun di sekolah hendaklah memberi pulangan maksimum kepada murid. Dengan kata lain faedahnya hendaklah dipulangkan kepada anak-anak murid.

Selain SK St. Anne rombongan Pengarah Jabatan Pendidikan WP Labuan juga telah melawat SK mendedai iaitu sekolah yang terletak di kem tentera.

"Saya merakamkan ucapan terima kasih kepada semua guru besar dan pengetua kerana telah membuat persiapan yang rapi bagi memastikan hari pertama persekolahan tahun 2020 berjalan dengan lancar. Murid dapat belajar dengan selesa". Encik Raisin Saidin, Pengarah Pendidikan Labuan



Encik Raisin Saidin, Guru Besar Ustaz Farihi, Mejar Hamka dan murid tahun 1 SK Memebedai



Puan Maimoon dan Encik Ag Marten sedang beramah mesra dengan murid-murid tahun 1 SK Membedai



Encik Raisin Saidin sedang memberi motivasi kepada murid Tahun 6 SK Membedai



Bergambar kenangan di SK membedai pada 2 Januari 2020



Encik Raisin Saidin dan Mejar Hamka Bin Harith Pegawai Pendidikan Pangkalan Udara Labuan berinteraksi dengan murid tahun 1 SK Membedai



Dari Kanan : Tuan Haji Sawal, Ustaz Rahman dan Puan Maimoon



Encik Raisin Saidin semasa lawatan di SK Membedai
Foto Oleh : Ustaz Mohd Syahir

Warga Pendidik Di Labuan

Hadiri Kempen Kesedaran Kanser Oleh MAKNA



Labuan, 09 Dis – Seramai 90 guru besar, guru-guru dan pegawai kumpulan pelaksana menghadiri kempen Kesedaran Kanser yang dianjurkan oleh Majlis Kanser Nasional (MAKNA) di Bilik Mesyuarat Botanikal, Jabatan Pendidikan Wilayah Persekutuan Labuan (JPWPL) yang telah diadakan pada 03 Disember 2019.

Kempen Kesedaran Kanser ini bertujuan untuk memberi penerangan secara terperinci mengenai kanser, perkhidmatan MAKNA, serta cara-cara membantu pesakit kanser untuk mendapatkan rawatan. Kempen ini telah diurusetikan oleh Sektor Perancangan, JPWPL.

Menurut Cik Melen Anak Sana, Pegawai Pembangunan Dana MAKNA, kanser boleh dicegah dan dirawat sekiranya dikesan pada peringkat awal. Namun, kesedaran kanser di kalangan masyarakat Malaysia masih rendah di mana kebanyakan pesakit yang datang ke hospital bagi mendapatkan rawatan kebiasaannya berada di

peringkat akhir. Tambahan pula, kos rawatan yang tinggi sering menjadi kekangan bagi pesakit yang kurang berkemampuan.

Majlis Kanser Nasional atau lebih dikenali sebagai MAKNA merupakan sebuah pertubuhan sosial ditugaskan untuk mengumpulkan dan menggunakan setiap usaha, kepakaran dan kebajikan dari setiap lapisan masyarakat untuk melawan kanser dan mengurangkan kesakitan, penderitaan dan morbiditi yang pesakit kanser sering alami. 'MAKNA' dan slogannya bermaksud "Mengingati Makna Kehidupan" (A Meaning to Life).

Sementara itu, Puan Kamariah Binti Salim, Penolong Pengarah Sektor Perancangan berkata, kempen ini diadakan untuk memberi kesedaran kepada seluruh warga pendidika di JPWPL akan bahayanya penyakit kanser dan pentingnya pengesanan awal bagi mengelakkan keadaan menjadi lebih parah.

"Kesedaran semua pihak adalah penting bagi mencegah dan mengesan kanser lebih awal. Kanser boleh dicegah dan dielak melalui amalan gaya hidup sihat. Kita berharap agar info yang disampaikan oleh pihak MAKNA dapat dikongsi kepada ahli keluarga dan rakan-rakan" katanya ketika ditemui.

Puan Sarifah Binti Suip, guru dari Sekolah Kebangsaan Pantai berkata, taklimat yang disampaikan amat menarik serta banyak info yang diperolehi berkaitan tanda-tanda awal kanser serta

makanan yang perlu dielakkan untuk pengidap kanser. Selain itu peserta berpeluang menyalurkan sumbangan kepada pihak MAKNA untuk membantu pesakit-pesakit kanser yang menerima rawatan.

Turut hadir dalam kempen ini Encik Azryn Bin Hj Mamma, penolong pengarah Sektor Sumber manusia, JPWPL.

Berita Oleh : Puan Kamariah Salim



En Azryn menyampaikan sijil penghargaan kepada Cik Melen Anak Sana

**Edugolf Jabatan Pendidikan
WP Labuan Mengambil**

Inisiatif Mempopularkan Sukan Golf Di Peringkat Akar Umbi



Labuan, 3 Disember 2019 : Edugolf Jabatan Pendidikan WP Labuan telah menganjurkan pertandingan golf bertempat di Labuan Golf Club.

Pertandingan musim cuti sekolah ini telah disertai oleh seramai 15 orang pemain golf, terdiri daripada murid-murid meliputi semua kategori.

Kategori yang dipertandingkan ialah bawah 12 tahun lelaki dan perempuan, bawah 15 tahun lelaki dan perempuan serta kategori bawah 18 tahun lelaki dan perempuan.

Penganjuran kali ini merupakan penutup tirai tahun 2019 dan terhad kepada mereka yang bersekolah di Wilayah Persekutuan Labuan sahaja.

Kejohanan sebelum ini telah dibuka kepada penyertaan pemain golf dari negeri jiran iaitu Sabah. [Klik sini : Edugolf Labuan Masters 2019 : Semarak Bulan Sukan Negara](#)

Murid SK Membedai, Nurfatin Syamimi memenangi kategori 12 Tahun Perempuan dan naib johan disandang oleh Nurfarah Batrisha Ismail juga dari SK Membedai.

Bagi Kategori Lelaki 12 Tahun diungguli oleh Muhamad Afif Bin Aznan dari SK Bebuloh, manakala tempat kedua Raja Muhamad Aqil Rizal dari SK Membedai dan tempat ketiga Amirul Hishamudin Roslan dari SK St Anne.



Encik Raisin Saidin dan Encik Hasbollah Amit bersama pemenang pertandingan
Sementara itu bagi kategori 15 Tahun Perempuan, Tempat Pertama dimenangi oleh Aida Hazirah Abzillah dari SMK Pantai IBWS, manakala Pemain dari SM St Anne Lailatul Huda Munawarrar di tempat kedua dan Nafisah Amani Shahrin dari SM St Anne di tempat ketiga.

Pemain dari SM St Anthony, Muhamad Azim Muhamad Farid mengungguli kategori 15 tahun lelaki, manakala di tempat kedua dimenangi oleh Leoneil Laing Lawai dari Labuan International School dan tempat ketiga Muhamad Harith Ayman Azhari dari SM St Anthony.

Bagi Kategori Lelaki 18 dimenangi oleh Muhamad Syamil Hakimi Azhari dari SM St Anthony dan Perempuan 18 Tahun

dimenangi oleh Nurul Haslinda Roslan dari SM St Anne.



Encik Raisin Saidin bersama ibubapa dan para pemain yang memenangi kejohanan Edugolf JPWPL

Majlis penyampaian hadiah telah disempurnakan oleh Encik Raisin Bin Saidin, Pengarah Jabatan Pendidikan Wilayah Persekutuan Labuan.

Encik Raisin Saidin dalam ucapannya berharap pendedahan di peringkat akar umbi ini suatu hari nanti akan dapat melahirkan pemain golf profesional dalam kalangan anak jati Labuan. Hal ini tidak mustahil kerana pulau ini mempunyai dua padang golf yang terbaik di rantau ini iaitu Labuan Golf Club yg terletak di kawasan bandar Labuan. Satu lagi ialah Labuan International Golf Club yang mempunyai tarikannya yang tersendiri.

Kedua-dua padang golf ini telah mencatat sejarahnya sendiri apabila menjadi medan persaingan pemain-pemain golf peringkat kebangsaan anjuran Kementerian Pendidikan Malaysia pada bulan April 2019.

Menurut Encik Raisin Saidin lagi pertandingan yang dilaksanakan ini juga adalah sebahagian daripada langkah

untuk menyediakan pasukan golf Labuan untuk bertanding dalam MSSM Golf Peringkat Kebangsaan tahun 2020.

“ Komitmen dan kesungguhan ibubapa merupakan pemangkin kepada para pemain remaja ini untuk mencipta kejayaan pada masa akan datang ”. Encik Raisin Saidin



Murid-murid yang bertanding dalam kejohanan Edugolf Jabatan Pendidikan Wilayah Persekutuan Labuan kali ini Beliau juga merakamkan ucapan terima kasih kepada pihak pengurusan Labuan Golf Club kerana memberikan kemudahan dan laluan pertandingan ini.

Majlis diserikan lagi dengan kehadiran Ketua Polis Labuan, Tuan Muhamad Farid, Timbalan Pengarah, Sektor Pembangunan Murid JPWP Labuan , En. Hasbolah Bin Amit, para ibubapa dan penjaga murid yang mengambil bahagian.

Anugerah Pendidikan 2019

Teknologi



Labuan, 21 Nov – Jabatan Pendidikan Wilayah Persekutuan Labuan telah menganjurkan Anugerah Teknologi Pendidikan 2019 yang berlangsung di Bilik Benua, Sektor Sumber Teknologi Pendidikan (SSTP) pada 19hb November lalu.

Sebanyak 16 anugerah teknologi pendidikan dan ICT melibatkan kategori sekolah rendah dan menengah telah disampaikan pada majlis tersebut.

Majlis Anugerah Teknologi Pendidikan ini merupakan platform untuk mengiktiraf dan menghargai pencapaian murid , guru dan sekolah dalam penggunaan teknologi , pelaksanaan inisiatif ICT dan media pendidikan, pelaksanaan program literasi maklumat, Pusat Sumber Sekolah, pengurusan data dan program pembestarian sekolah.

Majlis kelolaan Sektor Sumber Teknologi Pendidikan (SSTP) dan Sektor Pengurusan Maklumat (SPMICT) ini telah dirasmikan oleh Pengarah Bahagian Sumber dan Teknologi

Pendidikan (BSTP), KPM, Tuan Haji Shafruddin bin Haji Ali Hussin.

Dalam ucapannya, beliau mengimbau perkembangan teknologi di Malaysia terutamanya dalam mendorong transformasi dalam bilik darjah dan pengurusan pendidikan. Beliau turut menegaskan bahawa pendidikan berkualiti hari ini seharusnya mampu mengisi keperluan IR4.0.

Kementerian Pendidikan Malaysia akan meneruskan kerjasama dengan Malaysia Digital Economy Corporation (MDEC) untuk memperluaskan *Digital Maker Hub (DMH)*, secara perkongsian pintar dan *crowd funding*, sumbangan agensi dan syarikat serta dengan bantuan daripada institusi pendidikan tinggi.



Tuan Haji Shafruddin, Encik Raisin Saidin bersama warga dan para penerima anugerah dari SMK Labuan
Sementara itu, dalam ucapan aluan, Pengarah Pendidikan Wilayah Persekutuan Labuan, Encik Raisin Saidin berkata kemudahan ICT di Labuan agak baik berbanding dengan negeri lain terutama di sekolah-sekolah yang jauh di pedalaman atau pulau kecil yang lain.

Justeru, warga pendidik seharusnya bersyukur dengan

keadaan ini dan berusaha bersungguh-sungguh meletakkan Labuan di tempat yang wajar, khususnya dalam pembelajaran berasaskan ICT.

Tidak mustahil kita di Labuan, boleh menjalankan rintis “homeschooling” dan “eLearning” bagi murid-murid yang tidak dapat hadir ke sekolah atas sebab munasabah tetapi dapat belajar seperti biasa, tidak berlaku defisit pembelajaran dalam kalangan murid di pulau ceria ini. Encik Raisin Saidin

Turut hadir di majlis ini ialah Ketua Penolong Pengarah SSTP, Encik Ag Marten bin Haji Abdul Rahman, Pegawai Teknologi Maklumat, SPMICT, Encik Mohd Nazrien bin Abdul Rahman, para Pengetua dan Guru Besar, Guru Penyelaras Bestari/ICT, Guru Perpustakaan dan Media, Guru Data dan Maklumat.



Tuan Haji Shafruddin, Encik Raisin Saidin dan tetamu VVIP bersama pasukan tarian Antap Budaya SMK Pantai

Meningkatkan Kemahiran Bahasa Inggeris Melalui 'Pyjamas Party'



Labuan, 21 Nov– SATU program bagi memperkasakan kemahiran Bahasa Inggeris di kalangan murid-murid Tahun 3 di sekolah rendah di Labuan telah dilaksanakan di Isro Group Homestay. Program ini telah dianjurkan oleh Unit Bahasa Inggeris, Sektor Pembelajaran, Jabatan Pendidikan W.P.Labuan yang melibatkan 35 orang murid dan 17 orang guru dari 17 buah sekolah rendah di Labuan.

Program yang bertemakan 'Pyjamas Party' ini, bertujuan untuk membantu murid – murid di Tahun 3 yang berada di Tahap A1 (High) untuk mencapai sekurang-kurangnya Tahap

A2 (Low) bagi 4

kemahiran iaitu 'listening', 'speaking', 'reading' dan 'writing' berdasarkan

skala CEFR. CEFR merupakan ringkasan bagi 'The Common European Framework of Reference

for Languages'. CEFR ini ialah skala Eropah yang direka khas untuk

menggambarkan tahap kecekapan dan penguasaan mendengar, bertutur, membaca dan

menulis murid-murid di dalam Bahasa Inggeris.

'CEFR Pajamas Party' ini telah dilaksanakan secara aktiviti berkumpulan. Murid-murid memakai baju tidur dan diberikan sebiji bantal. Bantal-bantal ini mempunyai cetakan 'grammar' yang membantu murid-murid berkomunikasi dan menulis ayat mudah yang sesuai dengan aras A2 (Low) dengan betul. Antara 'grammar' yang dilampirkan di atas bantal berkenaan ialah 'singular & plural present & past tense for 'verb to be', 'to have' & 'to do'.



Murid-murid melaksanakan aktiviti dengan bimbingan guru.



Murid-murid berkomunikasi sesama rakan dengan menggunakan Bahasa Inggeris.

**PASUKAN KADET BERUNIFORM
LABUAN JUARA KESELURUHAN :
Orienteering Kadet Pasukan
Badan Beruniform Peringkat
Kebangsaan 2019**



Labuan, 19 Nov – Pasukan Kadet Beruniform Wilayah Persekutuan Labuan dinobatkan sebagai Juara Keseluruhan Orienteering Kadet Pasukan Badan Beruniform Peringkat Kebangsaan 2019 yang telah berlangsung pada 16hb November sehingga 18hb November melibatkan destinasi program di tempat-tempat menarik di Labuan.

Lokasi utama pelaksanaan program meliputi seluruh Pulau Labuan dan Pulau Papan melibatkan 100 orang peserta dari negeri-negeri seluruh Malaysia, walau bagaimanapun Terengganu dan Pulau Pinang tidak dapat menghantar peserta ke program ini.

Program seumpama **'Amazing Race'** ini berjaya menarik peserta mengunjungi tempat-tempat menarik di Labuan, antaranya Memorial War, Muzium Labuan, Muzium Chimney, Kompleks Sukan Air, Kampung Sungai Bedaun, Surrender Point, Taman Damai Layang-Layang, Pantai Pancur Hitam, Taman Burung, Taman Botanikal dan Pulau Papan.

Dalam memberi peluang mendekati budaya dan sejarah setempat, para peserta berpeluang menumpang ambuyat, membungkus kelupis dengan masyarakat kampung Sungai Bedaun dan menerokai keindahan pulau Labuan, berjalan kaki melalui Chimney Trail yang penuh dengan warisan sejarah serta berkayak ke Pulau Papan.



Aktiviti menerokai keindahan pulau di sepanjang pantai



Para peserta seronok dan ceria sepanjang aktiviti berlangsung



Aktiviti swafoto setelah selesai melaksanakan tugas yang diberikan

Para peserta telah diintegrasikan dari pelbagai negeri agar dapat bergaul mesra, berkenal-kenalan seterusnya menimbulkan rasa hormat-menghormati, tanggungjawab, kasih sayang dan kegembiraan dalam kalangan mereka.

Program anjuran Bahagian Kokurikulum dan Kesenian (BKK), Kementerian Pendidikan Wilayah Persekutuan ini telah dikelolakan sepenuhnya oleh Jabatan Pendidikan Wilayah Persekutuan Labuan.

Ketua Penolong Pengarah Kanan, yang hadir sebagai wakil rasmi Pengarah BKK, Tuan Haji Mohd Rashid Mean menyifatkan program orienteering ini telah berjaya memberi pengalaman di luar bilik darjah sebagai pelengkap kepada kandungan pembelajaran di dalam bilik darjah.

Acara perasmian penutupan telah disempurnakan oleh Pengarah Pendidikan Wilayah Persekutuan Labuan, Encik Raisin bin Saidin.

Dalam ucapannya beliau telah memuji peranan guru yang bersungguh-sungguh mengangkat martabat dan harga diri murid melalui program-program di luar bilik darjah yang

memberi pengalaman berinteraksi dengan alam.

Beliau turut menyeru semua peserta dari luar Labuan mengambil peluang meneroka keindahan Labuan sebagai sebuah pulau bebas cukai yang kaya dengan sejarah.

“Setiap anak murid perlu ditetapkan KPI tertentu dalam pelibatan dalam aktiviti kokurikulum untuk memberi ruang pengembangan potensi optimum melangkaui aspek akademik semata-mata” Encik Raisin Saidin

Menurutnya lagi, para peserta seharusnya dapat merasai kesan yang mendalam selepas melalui program ini dan diterjemahkan di dalam bentuk perubahan tingkah laku positif di dalam diri masing-masing.



Encik Raisin Saidin merakamkan gambar kenangan bersama kontinjen Selangor Darul Ehsan



Encik Raisin Saidin menyampaikan sijil dan hadiah kepada salah seorang pemenang

Program ini telah mendapat bantuan dan komitmen yang tinggi dari 21 agensi di Wilayah Persekutuan Labuan dengan kepakaran masing-masing.

Pasukan Kadet Beruniform W.P. Labuan telah dinobatkan sebagai juara keseluruhan dengan menjuarai 3 kategori aktiviti berbentuk pertandingan antara negeri.

Pasukan W.P. Labuan telah berjaya menjadi johan dalam pertandingan ikatan seraya dan serong, simpulan tali temali dan video pendek 1 minit. Pasukan Selangor pula mendapat tempat kedua keseluruhan manakala Pasukan Johor di tempat ketiga.

Pengurus Program, Encik Mohd Aminuddin Abdul Malek turut merakamkan setinggi-tinggi penghargaan, terima kasih atas kerja berpasukan dan kerjasama yang telah diberikan oleh semua pihak dalam menjayakan program yang julung-julung kali dianjurkan ini.

Turut hadir dalam majlis penutupan ialah DSP Mohd Firdaus bin Ramli daripada IPK Polis Labuan, Encik Muhammad Nazly

Ho bin Abdullah, Pengarah Jabatan Muzium Labuan dan Encik Asbola Amit, Timbalan Pengarah Pembangunan Murid, Jabatan Pendidikan W.P.Labuan.

Berita Bersama : Encik Mohd Nizam bin Yasim



Encik Mohd Aminuddin (dua dari kanan) menyambut ketibaan pasukan dari negeri Kedah

Amanat Akhir Tahun Pengarah Pendidikan dan Malam Penghargaan Jabatan Pendidikan W.P. Labuan



Labuan, 18 Nov – “Jadilah guru yang keberadaannya amat dirasakan, ketiadaannya amat dirindui”, demikian amanat akhir tahun Pengarah Pendidikan Wilayah Persekutuan Labuan Encik Raisin Saidin yang berlangsung di salah sebuah hotel di Labuan, semalam.

Peningkatan Kualiti Sekolah dan Kemenjadian Murid akan terus menjadi fokus Jabatan Pendidikan Wilayah Persekutuan Labuan tahun 2020 selaras dengan Pelan Pembangunan Pendidikan Malaysia (PPPM) 2013-2025.

Justeru, Encik Raisin Saidin berkata tugas yang diberikan adalah amanah dan tanggungjawab besar yang perlu dihayati oleh semua pemimpin di pelbagai peringkat terutama guru-guru kerana guru inilah sebenarnya yang berada di barisan paling hadapan bersama murid di bilik darjah, dalam merealisasikan PPPM 2013-2025.

Menyentuh pelibatan dan pencapaian anak-anak murid di Labuan yang terlibat dalam sukan, kokurikulum dan ko akademik sepanjang tahun 2019, Encik Raisin Saidin menyatakan sejumlah **4272 murid mengambil bahagian dalam peringkat negeri, 554 murid di peringkat kebangsaan dan 160 murid di peringkat antarabangsa.**

Beliau berkata lagi, 10 Sektor di Jabatan Pendidikan Wilayah Persekutuan Labuan telah melaksanakan 572 aktiviti seperti dalam perancangan tahunan 2019.

Catatan sebanyak 1758 bilangan pengunjung yang datang ke Labuan bagi tujuan pelancongan dalam pendidikan sedikit sebanyak membantu industri pelancongan di pulau ini.



Encik Raisin Saidin menyantuni Pengetua dan Guru Besar Labuan

Penstrukturan semula Kementerian Pendidikan Malaysia, Jabatan Pendidikan Negeri dan Pejabat Pendidikan Daerah telah dilaksanakan termasuk di Labuan bagi memenuhi keperluan Transformasi Sekolah 2025 (TS25) iaitu untuk memperkasakan kepimpinan dan pengurusan di setiap peringkat.

Sementara itu, mantan Pengetua SMK Ranche-Ranche, Encik Omar Baki Matusin yang mewakili pesara pendidikan melahirkan rasa syukur, terima kasih di atas penghargaan yang diberikan dan berharap agar Jabatan Pendidikan Wilayah Persekutuan Labuan akan terus maju di masa mendatang.

Di Majlis yang sama, guru SM St Anne, Cikgu Lim Swee Hong

dianugerahkan **Guru Sepanjang Zaman** bagi menghargai pengorbanan beliau selama 35 tahun dalam dunia pendidikan.

Encik Raisin Saidin turut memberi Anugerah Khas Pengarah Pendidikan Wilayah Persekutuan Labuan kepada Pengetua SM St Anthony, Puan Dona Undoh, Pengetua SMK Labuan, Encik Ismail Abdullah, Pengetua SMK Lajau, Encik Mohd Jamatin bin Abd Latip, Guru Besar SK Pekan Dua, Puan Hjh Dayang Damit @ Saidah bt Mohd Yassin, Guru Besar SK Sungai Bedaun, Puan Dg Sarifah bt A.Mahmod dan Puan Pan Yii Ying, Guru Besar SJK(C) Chi Wen.



Encik Raisin Saidin menyampaikan plak penghargaan kepada Cikgu Lim Swee Hong diperhatikan oleh Puan Cornelea



Encik Jamatin



Puan Pan Yii Ying



Puan Dg. Sarifah



Puan Hj Dayang



■
Encik Ismail



Puan Dona

Setinggi penghargaan dan terima kasih kepada warga pendidikan yang telah bersara dan berpindah jabatan tahun ini di atas sumbangan dan bakti yang dicurahkan sepanjang berkhidmat di Jabatan Pendidikan Wilayah Persekutuan Labuan.

Begitu juga peranan media di Labuan yang banyak membantu dalam mempromosi dan membuat hebahan mengenai pendidikan di Labuan.

Majlis Amanat Akhir Tahun diserikan dengan kehadiran 150 orang terdiri daripada Pengarah Pendidikan, Timbalan-Timbalan Pengarah, Ketua-Ketua Penolong Pengarah,

Kaunselor Negeri, para Pengetua dan Guru Besar, guru-guru, Anggota Kumpulan Pelaksana (AKP), warga pendidikan yang telah bersara dan berpindah jabatan, para jemputan media serta murid-murid yang membuat persembahan.

Puan Cornelea Grace Gordon, Ketua Penolong Pengarah, Sektor Infrastruktur dan Pembangunan, merangkap Pengurus Majlis tersebut mengucapkan ribuan terima kasih kepada semua ahli jawatankuasa yang terlibat menjayakan program ini.

“Labuan Superb! Guru Sayang Muridnya”

Fotografi Oleh : **Mr. Jeevareani A/L Samikanu**









Encik Raisin Saidin bersama warga pendidikan yang menyambut hari lahir pada bulan November



Encik Raisin Saidin bersama staf Jabatan Pendidikan Wilayah Persekutuan Labuan

Pemimpin Sekolah Di Labuan Hadiri Kursus Pengurusan Siri II Anjuran Institut Aminuddin Baki



Labuan – Seramai 48 *School Leader Team (SLT)* yang terdiri daripada Pengetua, Guru Besar dan guru-guru penolong kanan sekolah rendah dan sekolah menengah di sekitar Wilayah Persekutuan Labuan menghadiri Kursus Pengurusan Perubahan Siri 11 pada 14 hingga 16 November di Bilik Benua, Sektor Sumber Teknologi Pendidikan (SSTP).

Kursus tiga hari ini dikelolakan oleh Unit Pengurusan Bakat, Sektor Sumber Manusia dengan kerjasama Sektor Perancangan, Jabatan Pendidikan Wilayah Persekutuan Labuan (JPWPL). Dua orang penceramah daripada Institut Aminuddin Baki (IAB) Bandar Instek iaitu Encik Shamsuri Bin Jamil, Ketua Jabatan, Pusat Konsultasi dan Pembangunan Organisasi Pendidikan dan encik Ahmad Termizi, Pensyarah Kanan di jabatan yang sama mengendalikan sesi kursus tersebut .

Dalam kursus tersebut peserta telah didedahkan tentang Pengurusan Altruistik, penyelesaian masalah dan membuat keputusan, penambahbaikan sekolah dan mengurus perubahan. Sesi ceramah yang santai dan penuh ilmiah menarik perhatian peserta yang sentiasa fokus dan aktif merespon setiap pertanyaan. Malah para peserta turut berkongsi ide dalam suasana penuh ceria.



Peserta begitu tekun mendengar penerangan daripada Encik Ahmad Tarmizi untuk aktiviti berkumpulan.



Sesi “Pecah Ais” yang di kendalikan oleh Encik Shamsuri

menarik perhatian peserta

Kursus Pengurusan Perubahan bertujuan membangunkan kapasiti pemimpin secara holistik meliputi Kompetensi diri, komitmen dan perwatakan pemimpin dalam menyediakan pemimpin sekolah yang mampu menangani perubahan.

Menurut Encik Shamsuri, pembangunan kapasiti pemimpin pendidikan yang bercirikan keperluan pendidikan watan amat penting dalam usaha memastikan kemenjadian murid berdasarkan acuan sendiri yang mampu bersaing pada peringkat global. Justeru, pemimpin sekolah perlu sedar mengenai cabaran yang dihadapi termasuk meningkatkan kualiti kepimpinan masing-masing.

“Setiap pemimpin pendidikan perlu memiliki kefahaman mendalam dan pandangan jauh terhadap apa-apa perubahan dalam sistem pendidikan bagi memastikan mereka tidak ketinggalan dalam arus globalisasi,” katanya semasa sesi ceramah.

Dalam Kursus ini, peserta turut didedahkan dengan perancangan strategik iaitu cara mengenalpasti isu yang terdapat di sekolah berdasarkan laporan SKPMg2, merancang pelan strategik dan proses pembangunan strategik yang telah disampaikan oleh encik Ahmad Tarmizi. Diharapkan kursus ini memberi impak positif kepada semua pemimpin pendidikan dan menjadi wadah ke arah memperkasakan kepimpinan berkualiti dan futuristik bagi mencapai aspirasi murid secara global.

Berita Oleh : Puan Kamariah, Sektor Perancangan



Puan Kamariah menyampaikan sijil penghargaan kepada Encik Shamsuri semasa majlis penutupan kursus.